

四庫全書

集部

欽定四庫全書

集部

文苑英華卷

八十六至
九十二

詳校官內閣學士臣瑞保

助教臣常循覆勘

總校官進士臣朱鈐

校對官中書臣葉蘭

謄錄監生臣王廷璧

欽定四庫全書

文苑英華卷八十六

宋 李昉等 編

符瑞三

溫洛賦一首

河出榮光賦一首

梓潼神鼎賦一首

丹甌賦二首

仁壽鏡賦一首

西王母獻白玉琯賦一首

白玉琯賦一首

紫玉見南山賦一首

咸陽獲寶符賦一首

昆田化為金賦一首

溫洛賦

以上天何言因物表聖為韻

鄭宗哲

惟上天降厥瑞瑞著于用

疑

惟君人臨厥聖聖通于天

由盛德之應矣化清洛之溫然當短至之時景為凜烈
及暄變之際應在淪漣散彼皇明受茲靈眈奚獨稟於
和氣乃潛感於深浪遂使清冰不成於洲渚之曲白露
罷凝於薰葭之上狎而翫信溫溫以異流迫而觀亦滔
滔以難量爾其發自山谷會於河濱其外也皎兮如鏡
其中也煦然如春夏蟲不疑失輕冰於曲渚秋鴻欲去

應微暖於通津豈止玄覽不昧呈祥有因測彼淺深窮
茲浩渺方將表瑞氣於澄潔豈獨激巨浪於昏曉揭厲
之輩謂祁寒初失於波中游泳之徒疑薰風遠志疑於
天表若夫德至則應天且不言就其深則酌之不竭變
其性乃即之也温狀真宰為爐於其底意鄒子吹律於
其涼疑彼火井之熒煌湯泉之滄鬱徒及時於四氣寧
善利於萬物德之感其感良多水之瑞其瑞惟何方將
吹籟之共凜忽猶鼓索之相和霽日初懸似陽燧之藏

深瀨紅霞不散若陰火之在空波方今地不藏寶天惟
瑞聖茲水也有時而溫由一人之德盛

河出榮光賦

呂溫

麗乎天者曰漢紀乎地者惟河居上善以利物順朝宗
而致和時否則為災而獨昏墊運至則呈瑞以叶謳歌
豈徒列四瀆以居貴與百川而隨波者乎當其布德惟
新儲慶茲始濁色既變榮光乃起乍若燭龍噴焰上騰
鍾嶺之雲又似陽鳥迴翔下落咸池之水增華一代振

曜千祀信能陵晏海而比崇茂浴日而專美時則纖埃
不驚和風充盈大野初霽圓靈始清皎且潔兮孤明不
雜煥其炳兮五色斯呈祥煙歛彩瑞日韜晶掩輕雲而
旁屬拂薰風而上征百辟具瞻孰云其相照一人乃眷
自合於皇明庶品昭蕪衆幽光被大哉有國之慶赫矣
為君之瑞瞳矐玄黃熠爚丹翠洞鑒龍宮之人朗見馬
圖之字昔在溫洛致美化於陶唐復効靈於我皇先後
叶德今古和光比屋觀其自化遐荒望以來王詎比流

景集壇獨作郊天之應赤光照室空稱誕帝之祥而已
哉客有目觀滎河心傾聖日儻餘光而見及底幽谷之
可出

梓潼神鼎賦

以靈瑞珍
寶出為韻

盧庚

於戲德包生植者不能動彼天之道瑞及飛走者未能
感無一疑之寶故知瑞之大者下及無心之金石德之

深者上合不言之玄造我國家高選物理光天順人膺
景命闡坤珍由是函谷關旁靈符出而啓聖梓潼郡內

寶鼎光乎取新此鼎者聖人之大寶有國之神器量則

弘深體乃殊異疑如斷山之齒

一作崇

萃屹若巨鰲之鼎

屬峙其足者可以象三德虛其心者將以含萬類不汲而滿不燃而沸內烹飪以養賢上馭雲而作瑞應火木之卦既調鹽梅鏤山川之容且禦魑魅是鼎也豈徒靈感亦有款識不假彫鐫宛然文字實彼天之所錫表吾石之至異揭五百代之昌符成六萬年之寶位與夫遷鼎郊鄔卜代三十卜年七百者不可同日而議宜書于冊

于帝之庭以合明應以昭神靈士有聞而嘆曰昔黃帝
作寶鼎三秦帝莫神鼎一周之衰也沉泗水而隱藏漢
之盛也在汾陰而見出未有能來

疑作表

聖壽之無疆應

人文以純

一作終

吉竊亦欲負鼎于明主啓心而獻術若

能使我徵于有商豈見遺于今日

丹甑賦

以國有豐年為韻

薛 邕

神物昭見聖人是則五位時序兮萬邦以寧百祥薦臻
兮一人之德鼓茲靈器呈我王國有物有憑匪雕匪刻

察其狀而玄妙相其儀而不忒諒幽贊而克一作成矧

徽猶之允塞是知竒制可久嘉名不朽類君子之心以
虛而受同至人之德終善且有既應盛而自滿不假於
盤瓶亦詎炊而自熟何勞於薪樵擬神鼎之有用掩歌
器而無咎豈以塵見范丹之空賂為紀國之醜者矣且
夫清明在躬符瑞由衷誠之必感感而遂通獻白環於
重華克明濬哲錫玄圭於文命告厥成功此唐堯之表
旣蓋王母之欽風曷若自然挺出為瑞斯崇其應不昧

其用無窮莫因埏埴寧埃磨礱以彰我君聖以報我年
豐而已哉客有賦而歌曰玄德日用兮象帝之先丹甌
時見兮神物光妍中含虛兮體道上應規兮法天染人
無所施其彩飾陶人無所効其貞堅以享以孝兮可以
饋疑作饋饒多稌多黍兮屢茲豐年

第二同前韻

史翹

皇矣上帝臨下有則玄德升聞榮問充塞三光明而品
物昭報四氣序而黎人不忒雖休勿休惟靜惟默偉夫

自然之丹旣方作瑞于明德應皇運而無疆報時豐於
有國其業可大其功可久既申命以自天類有孚而盈
在循環外映爰假象以為名濩落內虛信當無而入有
明夫既耨既穫表此不稂不莠將有開而必先固茲器
之可守天應靈貺人期至豐不汲而滿將寶鼎而齊列
不炊而沸與溫泉而比崇異鈞陶之有作符造化之為
功千倉以之而發詠萬姓無嗟乎屢空且夫人為國本
食乃人天朝有代耕之秩野多擊壤之賢豈不以休徵

畢至瑞應無邊正色斯呈以明於聖感天資可尚是表
其豐年影亭亭於瑞日光泛泛於祥煙九功咸序八政
攸先超三皇而軼五帝尚何足夫比肩

仁壽鏡賦

并序

天寶初有獻書闕下者言巴蜀之間有石鏡見於巖之
半仁壽之字昭然可觀僕深竒之因而為賦

主上恢大寶闡鴻休仁風揚而玄德布壽星暉而皇化
流故得靈仙啓瑞石鏡涵秋無往不形鑒乃侔於止水

有來而應道可喻於虛舟懿夫化自天鈞質非鎔造亭
午克疑射靈朝曙早來洞穴之九仙對商山之四皓炳岷岫
之龍燭倒風壇之竹掃光能照乘不遺象罔之珠跡在幽
巖為啟崆峒之道動如秋水之澄皎如寒雪之凝駐清夜
之圓月挂長河之片冰其形不由於拂拭其勢豈假於鈎
繩君則無心惟德之斯感山非自爾喜神之有憑左援吟
右虎嘯萬籟相聒羣容必召雖復晉有金飾之美魏有銀
華之妙何如庸魅而野鹿羞窺愛舞而山雞自照昔之寫

刑一作形仁壽見膽咸陽倚玳瑁而稱麗挂珊瑚而益光

名傳歲月事著縑緙咸播美於前古孰歸功於我皇鏡
為之鑒與明德之合符石類於金惟聖躬之初應可以示
後世之千葉可以軌前王之萬乘記事之簡以光良史之
書頌美之詞更動詩人之興法天法地之謂仁不騫不
崩之謂壽惟仁也故能昭泰惟壽也故能長久萬人咸
識鄙石室之仙經六體自然輕漢園之卧柳我大君猶
抑而不納謙而不有小人無益於補天庶斯文之不朽

西王母獻白玉琯賦

以聖道昭格神物呈祥為韻

高 郢

君有德兮必體道以傳芳物有靈兮必順時以呈祥君
感物而德著物應君以名彰於皇有虞道光先聖既受
終於納麓乃禋宗而齊政光被人神澤周遐曼故得靈
祥効祉西母來朝霓裳璀璨羽服飄颻駕鸞鶴兮御松
喬陵碧落兮戾丹霄宴瑤池於旭日賓魏闕而崇朝其
始至也天地氤氳彤庭赫具奕奕其既覲也堦墀皓旰素

瑄爛其昭昭已而森列夔龍張皇金石仙侶齒於臣位
靈物陳其寶席真質貞明神光激射可使青瑣失翠丹
墀罷赤舞獸見而迴眸儀鳳觀而委翮信希代之名寶
旌有虞之光格若乃虛心守白圓質懷貞功高律呂用
等權衡價奪崑山之價聲如嶰谷之聲則隨一作趙之璧
楚之珩杯遇殷而入用珉因魏而來呈雖見稱於中古
固難可而與京是知瑄之為物信其直而不屈瑄之既
神乃歷代而可珍始與時而沿革竟隨物而沉淪否不

可終得之於道既逢奚景之賞寧從卞和之抱人亦如
斯堅貞美好願同和而見用以窺天而不寶

白玉瑄賦

以神人來獻以
和八音為韻

王起

玉瑄絕倫受之於神希夷感化皎潔含真既比德而為
美亦諧音而可珍肇自夔絕發茲璘玢匪剖石於和氏
乃成器於羽人伊昔帝鄉所傳王室未獻虹彩潛射蜺
旌並建鸞鶴映之以生光烟霞奏之以適願同鈞天之
樂靈境獨聞在層城之宮人寰共遠既而舜德有感王

母來過獻之皎皎捧之峨峨重華遂得其符瑞百靈永
謝其琢磨儻比以為笙知鳳吹之不遠如秉之為笛曷
龍吟之足多豈徒嗒嗒於茲竹碌碌於隨和若乃觀其
戾止察其所以質非干疑作竿籟韻含宮徵圓其表而合
規虛其中而通理光連素手雖提握之不忘色映丹唇
在吹噓而成美其捨也無聲之樂其獲也無疆之祉虛
而不屈老氏之籥乍同磨而不磷戎人之環孰比况乎
知白自守無瑕可猜色迷瓊樹影雜瑤臺懷清越之音

不扣一作求於扣感馨香之德不召而來固仙侶之所執

非玉人之取材則知素琯之祥玄理可察將使律合於
六音諧於八傳真人之逸韻資聖王之太曷宜乎藏九
重之深為百代之欽騰輝爛爛和俗愔愔使伶倫之簫
自慙叶律俾女史之管空媿垂箴無以窺天之心而忘
至德之音

紫玉見南山賦

以由德通祥至
如影響為韻

李 覲

南山之陽何珍不藏昭皇家之至德發紫玉之禎祥榮

熒兮千嶽動色炯炯兮萬壑生光映于林謂羣鳳之集
上據于石辨衆珉之居旁固已聞於往牒遂荐臻于我
皇稽夫所自無脛而至每隱曜而不欺曷招携之可致
所以瑞於有道將委質而式孚出非其時則韜光而自
棄南眺穹崇玉見于中貞姿豈琢勁質非磐遠而望焉
與彩雲而搖曳即而察也雜嘉氣之葱籠對白壁而即
異配玄珪而攸同故瑞無應而不至事有感而遂通通
人莫測孰知其色由是王者憑之而致理君子觀之而

比德明琬琰之在茲豈瑕瑜之有匿原乎玉之處幽儉
德是脩德表玉而應瑞玉用德而降休蓋真宰之潛運
知神功之所由不然安得揖至寶於潛谷闡皇風於大
猷而已哉若乃外徹中朗冷然如響佩服之處雖貴乎
山玄抵鵲之時固懷於土壤大矣哉瑞無常居因化所
如惟德是依彼自彰於符契不貪為寶我何待而沽諸
故客有觀光而歌曰歸太素兮遠蠻屏有瑞玉兮見霄
嶺浮紫氣於雲際混清輝於水影底南山之不騫期我

皇之惟永

咸陽獲寶符賦

君生人者在乎寶位守寶位者在乎靈符鎮四海而攸
重臨萬方而作孚時或遘迤暫淪精於甸邑道將昭泰
旋應德於皇衢日者兇師犯順賊臣附進隨黃鉞以外
遷與翠華而西幸苟遇運之云否將隨時而匿影忽影
脫於金繩遂沉埋於土梗既而寇盡天府駕旋京師衣
冠再朝於紫殿文物重布於丹墀聖上愍茲符之闕遺

恒寤寐以求之結精誠而仰望契幽昧以思惟皇心退
脩已聞於其政神器大集又叶於其期其形欲呈其氣
先覲何五色之可愛與三光而相射光凝渭濱之苑宜
玉樹之青青媚貫王都之川狀銀河之奕奕載求載索
甸人斯獲捧之而片月下來懷處而長虹上格臨宸扆同
舜德之文明照堦墀叶堯心之光宅玉鈕惟舊芝塗尚
新螭文外發鳥篆中陳題為天子之寶寶撫遠方之人
彼之近縣俯接城闔我唐既斬蕃將於橋上漢氏亦拜

單于於渭濱不然者曷不呈於異境而見於他辰者也
當其大君出令布蠻夷之政匪我無以重其成命遠人
底寧執玉帛於庭匪我無以闡其威靈足知寶符之復
光我昭代唐雖舊邦其命惟再頌聲作于外喜氣溢于
內藏之王府將神鼎以俱崇列彼帝庭與寶圭而相對
盛矣哉我唐之景祚信三皇之作配

昆田化為金賦

以祭祀明潔神
化之金為韻

地有百瑞美者惟金其見寡其應深故因神而呈足表

至誠之道從物以化更彰肅祭之心其祭惟何首山之
事其祭則那我皇所致始馨香以享德終潔敬而展意
向清漢以式瞻庶嘉祥於一至於是乎神報以福帝受
以釐昆田之上金化于茲考出地之形時則亡也觀從
革之狀維其有之原其始也未辨厥名莫知其價紛雜
乎珍異昭彰乎晝夜呈祥於水雖得神而生入息於時
亦待神而化及其變也倏忽而成爛然而明初比粟而
散點竟如螢以亂呈昔混丹沙南面之虔誠始荅今輝

瑤草西方之正色遂生山下熒煌田間昭晰向曙而野
花齊媚入暎而天星共列祥風拂而逾麗瑞露濡而更
潔至若隨車表舜還雨來秦或因初以出或從本而陳
未有遷移以禮變化從神以彼瑞為茲瑞易前珍為後
珍則知寶非神而不見其祥神非寶而莫臨其祭訪古
而昆田宛在閱史而清風不替別有泥沙久沉光影常
翳顧茲神之所開亦化形而表帝

文苑英華卷八十六

欽定四庫全書

文苑英華卷八十七

宋 李昉等 編

符瑞四

竹宮望拜神光賦二首

漢皇竹宮望拜神光賦一首

漢武帝齋宮產靈芝賦一首

西掖瑞柳賦二首 國子丞廳連理樹賦一首

連理樹賦一首 瑞橘賦一首

再生檜賦一首

竹宮望拜神光賦

以親饗度潔雷
報光燭為韻

張餘慶

洪惟漢后有事郊禋感流光之委照爰拜賜於上神初
自竹宮觀殊祥之溢目俄低玉佩方致敬而俯身有以
見感而必應孰謂其尊而不親徒想夫寰宇肅清齋庭
夜敞辛日惟吉明神是饗德馨而祀事精懋福降而禎
祥歸徃彼靈輝之自天若有答於吉蠲下雲路而瞥爾
照祠壇而炯然冥感而來狀如虹之炳耀齋莊則致配

明火以昭宣武皇自以為備物展禮儲精告虔苟降鑒
之不昧宜受賜於上玄仰而望之初奪目以爛爛俯而
見也且鞠躬以拳拳若然者豈不以蒼壁儼陳園丘宿
設帝心精一祀物豐潔天瑞聖而為光委靈壇而不滅
不然則何以煌煌熒熒發自杳冥予以表異于馮効靈

臨燿火

張晏注史記權火音燿周禮有司燿許氏說文
舉火曰燿此書第五十六卷有雍時舉燿火賦

不可泥司馬氏史記
索隱改作權火後同以助耀照俎豆而分形者乎跡彼

光臨實惟冥報宜望拜以俯僂表至精而懇到是知君

德允臧天道孔彰崇嚴祀而神降之吉潔齋心而物効其祥初電燧以散色忽星流以耀芒降自彼天豈慙於紫氣不資于水且異於榮光國家德邁炎靈時稱玉燭擁神光而先敬脩祀禮而將續有客觀光歎美不足何待時而就列底餘光之可矚

第二

同前韻

張公義

祀之嚴者饗帝德之盛者降神不勵精孰謂福之自已非表異曷知天實無親武皇卜郊以元吉祈靈於上辛

密命始傳光則綢緼未感齋宮爰拜神其胥蠻有音蓋
以穆爾精勤凝然存想屬屬乎蒼壁既奠煌煌乎太壇
攸仰委佩盡飾庶無詳以端莊秉圭展儀

闕

彼電破乎祥烟速閣之時燭

玩燭而明爛矣遙望之處拜起而容肅然豈不以配合
崇高昭陳宿設園丘之上將候其耿光竹宮之中以備
其齋潔既恍惚而有見竟起遙而未絕或左或右通幽
洞冥炤灼兮疑分暉於盡燭焜煌兮乍聯影於低星所

以彰有德赫炳靈實見詞祈疑周流福庭望神之休惟

一人有慶主日之際必上帝是聽故天降德疑祥人窺

其魚疑作至德而感豈玄邈之不臻至誠而祈豈昭彰

之不報首茲祀事實在陽方望拜雖同乎手拜神光且

異乎蕭光人皆見之孰不仰而祇慄夜則艾矣諒惟遠

之馨香殷雉雠而稱異魯郊牛而用傷皆祈報之瑣細

非昊穹之降康豈比夫神祠太一之靈樂飲一作歌童

之曲雖望之而如在懼敬之而不足漢后之虔恭也如

此故景光而下燭

漢皇竹宮望拜神光賦

以上辛之日有事於圖丘為韻

令狐楚

大事在祀吉日惟辛偉漢皇之光宅禮太一之威神就陽位
叙彝倫青旌既載蒼璧斯陳帝德惟馨虔精誠而上感天通
一作心疑作道不昧發神光而下臻斯所以昭乎望拜之地肅爾侍

祠之人懿茲珍神實曰靈貺奪月之魂韜雲之狀集于祠
側照此壇上神實臨下以無私君亦當仁而不讓是時也

神光未動遠靄初收
天宇清兮羣動和肅
帝座正而萬靈懷柔
修爾電燧若星流謂
珠蚌之初剖燭龍而
暫游武皇於是委玉
佩俛翠旒自竹宮望
圓丘拜上帝之賜擁
明神之休遐徵所聞
以此為異歌童不吳

見詩頌

以奏曲從臣

勿褻而在位奉其道
永肩一心答其祥敢
有二事光之降也帶
燿火

已注在前

今侵燎煙臨仙仗以增煥映靈丘而乍圓

帝之望也藝香蕭兮奠玄酒布清

闕

意

而不倦儼威儀而方久善行無轍跡搏之乃無盛德有行容

視之而有神既格思人皆見之助逮暗之祭彰燭幽之時
詎比夫望于觀臺而為備坐彼宣室而受釐故能飛扇
英聲騰乎茂實笑魯郊饑鼠之告僭鄙秦祀野雞而獲
吉來或從東似合序於春令至常以夜若避明於朝日
今國家成功巍乎明德依於鋪鴻猷而前王所羨崇嚴
祀而左史宜書備禮告天帝既踰於孝武觀光獻賦
愚竊慕夫相如

漢武帝齋宮產靈芝賦

史近

武皇帝慕軒后之風儲思幽通叶珍符於瑞牒產靈芝
於齋宮太一清精元君降衷色奪兼金發靈姿以溫潤
質逾美玉浮真氣以葱籠原夫帝在華帳儼于仙仗睿
思邈以冲寂神心宥其相向髣髴受釐肅其冥眈非煦
育之所致乃精神之潜暢挺茲三秀表信乎三元之符
擢此九莖示期爾九垓之上異屈軼之致用類朱英之為
狀足表天感與地生或揚臣和而君唱是知至精潜運神
物昭彰靈液潜通願生乎枯木貞石神心幽贊故出此

闕殿神房剋庶草以為貴故有時而發祥信稟質以津
澤非本媚乎馨香豈比夫楚水之空嘉萍實仙宮之獨
貴玄霜懿夫道心虛澹我則無味以玄感化象貴形我
乃無根而効靈是用拔竒瑤砌標異彤庭紫蓋與祥雲
允合朱莖將火德相冥秀射倚蘭之室光連雲母之屏
煥國典而永昭歌頌徹玄風而不耀德馨彼丹甑呈豐
器車表德潛美巖野挺芳幽側曷比夫耀甲乙之帳赫
矣朱榮結天地之精渾然剛克異朝菌之為體同夜光

之非飾含聖澤以成春體正陽而稟色是知人心告虔
珍物効焉將會昌於羣帝必功格于上玄且神之符則
受此靈草神之會則降彼真仙苟獲符而為約與降質
而相懸大寶在乎皇極真居本乎丹田苟溺異以趨怪
顧汨聽而表年彼乘嶠而求靜此執迷而徵聖徒有托
於齋祈信無裨於性命覩芝宮兮緬爾一作條隙駟以
奔競庶歸玄化之門小彼炎皇之慶

西掖瑞柳賦

以應時呈祥聖
德昭感為韻

郭炯

炯

乾坤至誠草木無情神靈乘化而致理枯朽効祥而發
生當聖澤未沾故兀然枯瘁及天光迴照遂藹爾敷榮
因萬物以咸遂與百祥而畢呈故得垂陰瓊闥之中固
本鳳池之側始孤標而穎拔乍苒弱而條直長充西掖
之佳翫迴奪東門之秀色芬敷自異永垂不朽之名變
化無一作殊常用表好生之德懿其萬生漸蔚幹聳惟條
拂瑞景而增麗裊祥風而獨搖可以彰聖主之玄感可
以見昊天之恩昭舒卷以時陋梧桐之半死榮枯順理

鄙松柏之後凋且春布發生之慶秋行肅殺之令於天
地而不失其常在金木而各得其性衆皆畢出盡達我
則向日而衰衆皆黃落萎腓我則感時而盛不然何以知
至德之動天運神功而瑞聖者矣翠色泔泔異酒泉嘉
柰之祥輕陰澹澹同鄙郡枯梓之感烟銷雨霽霏素雪
於宸居日宴疑作晏春深雜繁於睿覽青翠歲蕤垂軒
拂墀在日月偏臨之處當駕一作鸞集苑之時至矣哉
天降靈貺聖為明證既得地而不雜衆流常託根而獨

標美稱是知天聽自人而應者也

第二

同前韻

陳 誦

柳變西掖瑞彰聖時感巡遊之未至失榮落于先期雨
露所均常比中國一作園之鬱鬱宮闈暫閉若無春日之

遲遲所以望車塵之行幸慰都人之怨思物或有憑神
固難測生植不易地而殊榮孤影忽同秋而異色豈上天
之降鑒俾下民之是則予以激忠臣之心予以彰大君之
德初斯柳之失常人未知其為祥秦原之煙景明媚漢

苑之草樹芬芳獨孤彫而槁瘁似永隔於風光無絮花
之似雪意膏露之凝霜及夫天迴舊步木得其性千官
捧日以輸忠萬騎從龍而翊聖彼衆芳之已歇我得秋
而始盛豈固異於常材實願貞乎景命偉夫瑞發匪遙
成天意之孔昭德惟可覽結人心之幽感不然柳且無
情曷枯而生其枯也當煙塵之晦其生也表氛沴之清
與時不偶叶聖斯呈政或可持疾風始知夫草勁節無
所立歲寒徒稱乎栢貞宜其俯鳳池而灑潤接鷄樹以

連榮儒有因物比興屬詞揣稱聞瑞柳於春宮遂揄揚
於天應

國子丞廳連理樹賦

王履貞

靈臺崇崇兮洞輶轄以綿延中有珍木兮鬱森森以芊
芊始殊形以分聳終共理而連拳始信聽三字一作以

信聽德

被物初應聖而効焉且學為教原丞為糾局生於學者
表王化之大同植於廳者知官政而無曲亦所以據於
德而遠於俗也樂我皇道彰我聖年謂為交柯乃尋本

而無末謂為別幹能已離而復連依君仁義之國對君翰墨之筵俾為我師者如斯木之一德為我曹者如斯木之相全故瑞不虛然從化而止化不在遠行之由已
有善必應詎云草木之無知惟德是親奚問陰陽之至理可以載美青史可以表慶皇家人各有心我則合而為一物曲有利我則不避其斜夫如是則造化之理易尋天地之情可測順之則生瑞逆之則成慝故曰禍淫
涵福正直諒物情之効祥由人君之布德故得托根講

肆之宇垂陰夫子之牆雜庭槐以為列偶仙杏而成行
逢聖而生匪由乎日月以翼取端為寶孰尚夫金玉其
相所謂光乎泰階允臻靈貺不然者則徒聞其說孰究
其狀至矣哉觀一樹之攸同知四夷之內向

連理樹賦

陳 諷

惟薰風之生物有穠李之表禎合連枝於異幹符一姓
於嘉名交影齊密均和共榮諒全德之通感豈元和之
曲成族堅附離訝生植之異氣殊質合體識天地之幽

情考彼祥經珍茲善價昭一人之有慶表四夷之嚮化
體符通理黃中之象攸存義用成蹊不言之道斯備蓋
夫靈根得地聳質齊芳分條表異合幹呈祥膚含玉潤
文蔚龍章雲交翼比影附枝強庇本根於仙族挺孤秀
於仁鄉始則分形謂陰陽之偶數終而貫一表遐邇之
通方是知玄本靈種暗符神用諒翦伐之為重合拱連條
允孚歌謠固耳目之所昭並甘棠而價掩比叢桂之香
暹則知瑞以感生祥由仁致覩政疑分而脉會契人事

與天意將德茂而精通故駢踈而合異于以昭化警俗
示人不二豈比夫草生堯砌空有紀於萼官芝產漢宮
徒用彰於祀事洎夫玄律發春東風薦臻齊敷連歷之
影共沐陽和之津想雙枝於棠棣感合體於君臣四海
為家豈必移根於上苑五事敬用固亦發瑞於仁人彼
晉得華林漢生廣殿諒崇功而問出豈謙一作涼德而來
見願棲託之見容恐光陰之不薦

瑞橘賦 并序

李德裕

清霜始降聖

一無此字

上命中使賜宰臣等朱橘各三枚益靈

園之所植也臣伏以度

一作渡

淮為枳由地氣而不遷吹

谷生黍信陽和之所感昔漢武致石榴於異國靈根遐

布此西域柔服之應也魏文

武作

植朱橘於雀園

一作銅雀

華

實不就乃異人未格之兆也考於前史昭晰可知豈非

天地和同羣

一作靈

物効祉去蠻夷之陋獲近太陽感王

化之盛更承膏露草木尚爾况乎人心漢宣帝宮館山

澤意有所感必使

一作詔

近臣賦之臣幼學為文忝列樞

近敢稽首獻賦曰

美南州之嘉樹受烈氣於炎德固一志於殊方遂不遷

於上國貞葉凝碧蔚

一作
藹

湘岸之夕陰華實變黃動江

潭之秋色雜丹楓於溪畔映綠篠於巖側翡翠以之列

巢鷓鴣由是

一作
焉

棲息雖同霑於雨露竊自得於彫飾

終獲譽於皇明豈因人之

一作
而

羽翼感大鈞之獨運幹

造化之玄力思六合以

一作

同風採孤根而移植播元

氣以

一作
之

茂育諒陰靈之不測逮乎霜飛文

一作
天

囿風

落秦川金莖炫晃於朝日玉樹菁葱於霽天幾方壺之

翠島引一作列靈沼之清漣上蔚檉松下秀蓀荃葩朱草

與屈軼煜紫芝與賓連靈卉畢植而嘉橘在焉翠葉獨

潤金衣更鮮天漢之華星焜燿閭風之珠樹粲然香若

團於野露色疑炫於江煙既而太官獻新奇果列筵非

一作飛厥包之自遠何菲陋之莫傳樹隱方塘比丹萍之

初寶盤映皎月與赤瑛而共妍東鄙孤臣謬塵三事既

乏和羹之用猶需可口之味并食不剖一作割竊愧晏嬰

之知捧之以拜重感桓榮之賜庶不改於雪霜

一作霜雪永

酬恩於天地 凡一作皆集本

集文苑時古書尚多又校讐皆名士近刊文集頗
經淺學改竄或當或否安可例以為正柳宗元白
居易李德裕等文偶爾流傳如此賦內文園者文
王之圃也集本作天圃大率類此

再生檜賦

温岐

檜有再生之瑞天符聖運之興挺松身而鱗皴迥出布

栢葉而杳藹相承隋道既窮則沒身於亂土唐朝將建
故發德於休徵原夫日將興而幽暗皆明君應期而纖
微必表生於枯朽證受命於敗德之時長則繁華示寶
祚於延慶之兆想夫拔陳根而已茂聳脩幹以方妍凌
朝而還宜宿露向晚而尤稱新煙以狀而方生莢之枯
楊若此以理而喻易葉之僵柳昭然効殊祥以示後願
衆瑞而居先嘉其擢本傍榮抽條迥秀歷朱夏而彌盛
冒霜雪而不朽應昌業於龍潛之際豈曰無心彰聖德

於虎視之前孰云虛受徒觀夫載光紫府劾祉皇家竦
亭亭之柯葉擢鬱鬱之輝華可以播之於萬古可以流
之於四遐是知歷數歸唐禎祥啓聖何厚地之朽木報
上天之明命殘陽未落宮庭之林藪忽生明月初懸玉
砌之桂華復盛矧夫貞節獨異高標自持散芳氣而微
風乍動入重陰而宿鳥猶疑蓋天所贊也亦神以化之
客有生遇明時身蒙至德窮勝負於朕兆慕休祥於邦
國敢獻賦以揚榮遂布之於翰墨

文苑英華卷八十七

欽定四庫全書

文苑英華卷八十八

宋 李昉等 編

符瑞五

棠英賦二首

指佞草賦三首

朱草合朔賦一首

瑞麥賦二首

平露賦一首

嘉禾合穎賦一首

甸人獻嘉禾賦一首

棠英賦

以呈瑞聖朝為韻

程 諫

堯堦莫英兮實稱休禎蓋歷代而難值至我后而斯呈
植之以前墀左城映之而鏤檻丹楹激薰風而葉轉迎
太陽而心傾日徃月來深符大小之數時和厯應因見
天地之情觀乎榮謝以月德為常卷舒以日數成類隨
初吉以增茂暄然自春度既望以漸零翛然如寄體盈
虛而方同得道任消息而匪殊有智金波桂樹遠合象
於彫榮炎漢芝房近方慙於祥瑞彼朱草與萑蒲曷於
茲而擬議則知聖作物覩物興由聖聖於赫而克著元

亨物効祥而天莫之令然而莫之為應也博莫之為瑞也昭贊睿主則太平在邇測陰靈則時變不遙初也則日益一日終也則宵盡一宵弱質決金莖之露輕姿散玉戶之颺或曰麟在郊而合圖牒鳳來儀以聽蕭韶雖咸見而可貴於列迹而斯超豈如蒙賁著總集於厚地焜耀於皇朝

第二同前韻

呂諲

聖人法天兮無物不成皇天輔聖兮有眚必呈莫英之

嘉植爰乃應乎休禎稟神

疑

靈以擢質因堯堦而得名

抽莖萼萼布葉英英二八而落三五而盈陰德自然仰
蟾蜍而知晦太陽常近與葵藿而同傾爾乃丕體其祥
博考其義所以厚上天之德所以表皇王之瑞其國亂
也則植之猶難其國理也則生之孔易惟我后之欽若
亦合符而受賜承榮金殿旁沾三露之滋每奉玉階上
蔭五雲之施豈無萱草以悅其性豈無靈芝以彰其盛
芝擢其秀既以紛綸於策書萱樹於堂曷能彌縫於明

聖未若莫英生於皇朝與夫髦士來應弓招受成於天
諒多聞於國瑞託得其地且有異於山苗竊預談於王
道庶有望於遷喬

指佞草賦

以靈草無心有
佞必指為韻

梁 肅

聖澤濡煦兮動植斯形相彼瑞草兮逢時効靈體嘉生
於浩氣秉直道於彤庭昔在堯帝至化惟馨伊屈軼之
芳貞協王猷與國經有皇睿后德動杳冥二氣暢而羣
生遂百祥來而萬宇寧矧夫佞者小人之道直者為國

之寶雖糾正於邦憲實發明於瑞草象恭言僞於是焉
去而勿疑葉布莖分何患乎辨之不早若乃一人當宁

一作

超黃越虞百辟來朝日臨雲趨風力論道伊咎陳

謨瑞草在前疇敢以諛故曰物生於有有生於無感此變
化發為禎符不然彼植物之何知乃同功於帝俞天道
不言聖人無心寓形闡教其用則深禾穎降於周王芝
房發於漢后信呈豐兮告慶并垂美於不朽彼集作直
指以去邪諒於功乎何有我明主所以超三英之躅彼

靈草所以為百瑞之首有由然也火魚守直宣父惡佞
佞直不分邦家靡定惟草所指惟皇所聽指歸乎一聽
戒乎失苟君集作道之不弘徒倚瑞以自必重曰瞻彼
草兮直而指佞聖之瑞兮時之禮頌皇休兮無極已

第二

同前
韻

沈封

伊嘉卉兮昔生軒庭蓋歷代而莫觀其狀至我后而方
覩其形對右平與左城間朱草與彤庭一作
階薰風晝灑
湛露宵零所以彰吾君之睿聖所以表吾君之德馨匪

然何以於昭其異有赫厥靈根莖竦擢枝葉靜好惡夫
佞允叶乎聖心作乎祥特異於靈草况今勤施五至克
奉三無多忠良之士絕讒佞之夫非斯草之助化何以
臻於此乎指佞之為德也廣指佞之為瑞也深逢聖斯
生介一人之景福有佞必指俾百寮而革心故能殊衆
芳之質標羣瑞之首彼獬豸之觸邪抵罪在法則嚴伊
平露之傾葉知方於人何有孰若我應明聖指邪佞昔
之輔德告軒后之功成今也呈祥贊吾君之理定一名

屈軼千載挺出有佞則指孰云無必豈比夫菴蒲空扇
於堯厨芝房徒歌於漢室哉足以彰邳理薦嘉祉君子
在位我則恭默以傾心佞人入朝我則無私以直指信
可以美芳聲於雅頌垂不朽於國史

第三

同前韻

鄭 轅

旒宸肅誠天地降靈蓋臣咸造屈軼生庭翠影如植皇
心以寧暑屏寒生感菴蒲之代謝日來月往異萸英之
飄零烏奕玄造誕生厥草表忠蹇之不遲懼任佞之何

早宵承湛露密葉如傾晝偃薰風纖莖若掃猗那且都
歌詠難模其生也則一其道也乃殊育於軒堦其指或
有生於聖代其用則無是靈草之無心以聖人之為心
對危行而不侮覲巧言而則侵榮乎砌陰實為龜為鏡
肅我皇度式如玉如金冠卉之首綿代曠有茅三脊之
可封芝九莖而延壽曷若茲草之盛莫之與並類貂蟬
之性潔均獬豸之質勁得詩人之無邪行疑孔門之遠
佞於鑠屈軼邈乎迥出遇唐復生應時作實經百王而

影戢歷

一作越

千祀而宥密如執法之不回奉直道而自

必所以野退宵人朝多髦士同魚水之合契絕蟬竦之
莫指封思齊於大夫名可比於君子謝有香之蘭蓀惡
無言之桃李

朱草合朔賦

韋模當

縣官執大法闡大猷道惟行遠化必通幽彼朱草以合
朔示皇天之降休月始而生用資乎陰陽月虧而落事
契夫冥搜其於作候靡或不由乃知天罔私親神惟輔

德苟明智之有務必冥報而無忒或產冰涯或生巖側
布赤葉之蒨練挺朱柯之翕絕既周復而莫窮與乾坤
而不極誰究其義吾知其為美一人之化洽俾萬國而
澤被由是節候不疑生榮以時依天聽以叶祉順月魄
以呈姿朔告合焉表皇化之無異草名朱也比丹心兮
自持較瑞不慙於莫英稱珍豈讓夫一作靈芝觀其光
彩妍媚文理密緻資亭毒以榮落以神祇之奧祕三五
之前逐蟾光以潛長二八之後與桂華之一作暗墜匪

權量之能侷將漏刻而齊致其氣芬芳其色焜煌聖帝
攸感靈仙是常何纖芥之微物遇休明而効祥諒君恩
之克播致天意之溥將可以同覩日月共貫陰陽豈止
清玄醴變金漿而已哉懿夫分莖灼爍擢穎超遙候朔
自呈詎比夫偶陽而動既望斯隕寧同乎見暝日消幽
玄不測神化孔昭自然澤浸有截化行無外三光並明
兩儀交泰於靈草以配歷冠古今而為大

瑞麥賦

任 瑗

建極惟皇昭鑠于光出豫考卜乘時省方西自鄴鎬東
巡洛陽順天遊而有度協日晷之云長徵賢宣室布政
明堂風雨時序黎庶其康盡物稱瑞窮靈委祥明含疑

日月則階莫恒秀澤及草木

一作莽

而隴麥登芳於是闢

離宮通禁苑覩茲瑞之所應實皇恩之燭遠朝任得人
時唯賢相九流分職三旗協亮稱堯舜之允敷同益贊
而禹唱曰珍瑞麥生我皇國凌寒而秀彰聖之德願載
東觀之書以歌南薰之則既而帝曰欽哉天符聿來俾

予光于四表惟爾翼于中台念幽芳之遂性知樾樸之
當材且夫麥之為瑞其德至矣居寒自生當暑薦美含
寶珠淨耀芒鋒起既標詠於詩人亦稱竒於鮒史當其
芄芄于野漸漸其秀將嗣穀以登年豈凌霜而不茂在
昔唐叔嘉禾伊育昭彼周王天人斯穆今惟聖帝此焉
攸淑涵之如春也及晝而繁榮就之如日也來牟而紛
郁則有小儒怡然鼓腹照水鏡之光鑒叅歷選之題目
未登高而賦成底陳美於金竹者也

第二

高敬庭

聖人順動文思欽明天地貞觀品物咸亨去憑虛而就
安處面周洛而背咸京雲旗電發霜戟林行太陰用事
其日在斗萬國來庭百神奔走泉潛動而菱落水益壯
而冰厚冠異氣於繚垣吐嘉蕤於寒藪不忌風雪全抽
兩穗逼日月之光華得雲雨之攸利芒纖纖而擢隴葉
青青而聳翠同泰谷之移暄類榆林之因地瑞紀增煥
嘉禾異殖出天苑以一作稱竒訪人寰而未識凌玉霜

而表勁挺金莖而孤植顧擢穎於年和望生成於地力
倬彼藩翰其代天工即漢庭之相國類晉室之清通拜
殊祥而北首列圖史於南宮紆粹容於有穆冠鴻業而
無窮實穎實粟是崇是奉可以為瑚璉之姿可以為種
稂之種偉長至之馭序同少陽之在候成粒貴於鳥銜
覆苗期於雉雌夫瑞也百王之珍事其生也二儀之大
德道泰則稱物呈形政乖則羣方皆忒伊小草之何幸
逢大人之允塞願均照於離明祁作禎

疑作
植

於王國

平露賦

惟唐累慶唯天眷命植平露之殊祥表吾君之睿聖不
窺於牖可以辨百寮之賢不下於堂可以觀四方之政
其儀可尚其義可覈平也者所以表太平之時露也者
所以彰雨露之澤以此知庶類光贊神功昭格也希代
以出曠古而無空嘗覩於青史獨有驗於祥圖借如嘉
禾合穗且生於隴畝萋蒲扇食未遠於庖厨孰與夫薦
祉於彤庭之際含榮於紫殿之前亭亭莖擢的的規圓

屬乾坤交泰風烈昭宣是以執正自守居中不偏偶香
堦之冀英對玉戶之賓連以承君顧眄以奉君周旋非
夫聖哲首出英賢在位君臣同心上下一致五帝可以
六三王可以四亦曷能感於茲瑞如或政有所缺道有
未光則低枝傾蓋應是知方寧茲物兮自爾信有神兮
所將似能存於烱誠豈獨効於禎祥客有聞之而歎曰
於戲哉莫瑞匪靈匪聖莫丁偉茲平露卓爾祥經物之
咸若國之康寧觀珍符之有炳敢不頌乎德馨頌曰官

為賢兮政無失君與臣兮德惟一伊平露兮應時出彰
聖代一作出兮光史筆

嘉禾合穎賦

張禎祥

南山之下兮無人之境力穡此中兮均夫躁靜勞則不
憚既寒耕而熟耘慶有所歸忽異畝而同穎莖駢惜芄
芄之色秀合垂萼萼之影此焉觀瑞亦秬以異比於木
乃連理之祥在於人蓋同心之義稔已聞於二米莖乃
殊於九穗豈非德之能及實聖朝之所致爰考休徵豐

年是憑麥兩岐而能匹茅三脊而徒稱固神倉之可貯
期郊廟之以升欲薦堯階且聞程程之獲疑作將登禹
膳遂入焯焯氣出也之蒸天道玄默瑞以表德豈無沃土
而光於我家豈無異方而祚此王國不有嘉生孰謂賓
榮友朋之心因取興於連茹兄弟之樂遂作成於分荆
佇聞唐叔之獻頌我后之昇平

甸人獻嘉禾賦

趙蕃

聖上崇國本致時康動玄象之昭鑒產嘉禾而應祥甸

人於是具畚鍤修封疆啓芳穎於修畛薦靈姿於我皇

懿夫挺拔

枝 擬作

自分連拳相接始穰穰而齊實終矯矯

而異葉殊其本均二氣以發生同乎心表一德之和協

不然者寧擢秀於墳衍載具美於圖牒徵其瑞質稽彼

大同見芬敷而共貫信縈結以交通則知符乎帝道發

自天功合穗之珍方將効祉於今日異畝之美豈獨標

奇於古風於是野老歡心田夫盡力宛移根於沃壤之

際俄發耀於丹墀之側祥煙近拂乍疑連理之形喜氣

傍臨更辨合歡之色彌彰執契之道載助惟馨之德爾
其天鑒非遠神珍是呈始苕亭而間出終夭矯而曲成
豈比躬稼之時盡化晉君之草挺生之歲克符漢帝之
名向令質委離披孤生萃尊安得臨玉砌邇龍袞設種
稜疑作種之萌芽為理化之根本是知六府惟序萬邦式
孚茅三脊而非偶獸共觝而自殊未若耀青芳於近甸
垂嘉貺於靈圖况復聖慮彌深皇猷思永梯山航海未
足契其休光菲食卑宮將欲示其豐省斯所謂騰茂實

於厚地故薦穗於重穎

文苑英華卷八十八

欽定四庫全書

文苑英華卷八十九

宋 李昉等 編

符瑞六

進白鳥賦一首

白鳥呈瑞賦二首

京兆府獻三足鳥賦二首

白雀賦一首

越裳獻白雉賦一首

上林白鹿賦二首

白鹿夾輶賦一首

白兔賦一首

進白鳥賦

張說

洛大鈞之播氣在品物而流形有莫黑之凡族忽

一作亦

變白而効靈感上人於孝道合中瑞於祥經若夫事出

神妙理以

一作也

舒卷既集王屋飛隨帝輦捧日高翥迎

風細轉識句句於招呼每啞啞於

一作咏

吮以其雪羽

霜毛冰清

一作精

玉狀拔竒綠林之下賞異紫臺之上瞰

鵝鵠之妙憲把

一作抱

鳳凰之衣桁恐同類之見嫉畏不

才之速謗期委

二字一作願悉

命於渥恩豈願思

二字一作願思於閒

放維聖君之靈囿物何遠而不臻有能言而可重或善

舞而取珍若隨驅

一作羞隨驅

而入獻與寶羽而為隣採

一作

探朝噪之聲樂眷夜啼之曲新無芒距而躍武不鈞觜

以懷仁謝先容而特達却假飾以全真鑒深心於反哺

終

一作移

報德於君親

凡一作皆集本

白鳥呈瑞賦

裴度

翩彼靈鳥賁然効質披圖牒而因二叶邦家而得一備

體有光至真無匹宗廟薦敬帝王之孝克孚天地感仁
潔朗之容可述恥受彩以相混故莫黑而獨出上瓊樹
而若無下瑤階而乍失懷恩反哺方去去以凌雲養素
來儀且翻翻而就日觀夫載飛載止厥狀粲然不染而
成因心之孝以立匪名而至感物之道遐宣向皇風而
自舞與麗景而相鮮人具爾瞻既含章而効祉我無爾
詐乃見素以守全乃知王澤竭而退飛帝道通而無遏
彼明心兮不妄至知大節兮不可奪象潔白而攸歸知

愛敬之傍達懿夫不汙其色固違斯道秀質安倚凝光
淨好美仁慈之及物故易色於昭昭惡赤黑之眩人乃
成形于皓皓且夫應圖咸若鄙臯澤之鳴鶴瑞聖不還
陋江湖之白鷗諒飲啄於仁義豈逃潛於阻艱所以其
出無常其來有素雲凝標於羽族玉潤合於王度常從
碧海隨景日而悠揚今在華林偶盛時而瞻顧實由我
后敬之昭假皇矣光宅垂拱而燭幽以明禽鳥乃化玄
為白逗祥光而聿至望休氣以來格時哉時哉奮翹英

於紫陌

第二

孟簡

驗白鳥之祥牒告皇家之寶祚蓋由天子張至仁本太
素享宗廟而無與薦孝敬而有度何嘗日浴翻皓體以
來儀曾異火流奚丹羽之可慕凌翯翯之白鳥類振振
之翔鷺稟純德而自甄誠衆色之難汙觀其皎皎奇狀
明明麗質霜義潔朗玉姿閒逸不愛其瑞嘉載飛之可
瞻思効其祥見莫黑之如失寧爰企於往代可俯窺於

今日原乎孝理通玄格皇至虔惟烏感應其容昭宣抱正
色而道洽徒一作從反哺而名全不然則有威鳳之可紀何

白烏之是傳樂而有聲且不棲于楚幕潔而成質故自協
於靈篇出林而日華亂動繞樹而月影相鮮嚮至化而遠
集想皇風而戾焉衆而何為悲子生之八九大而無慮笑
水擊之三千爾其超遙高翥來不可遏見歸飛之薦臻誠
愷悌之四達諒深仁之所化固至性之難奪若乃載鳴嗷
嗷浮彩皓皓受西方之精氣自洪爐而鎔造遐想其蒼赤

呈祥豈與乎霜雪同縞且夫仰稻梁而自若彼徒寵之仙
鶴待馴狎而不還何必招於白鷗且養素而委質非取容
而強顏故下臣賀瑞而歌曰素德式昭兮何舄奕玄質從
化兮為潔白符仁孝兮叶佳冊見祥瑞兮流聖澤

京兆府獻三足烏賦

以平上去入周
而復始為韻

李雲卿

杲杲靈烏萃于神都耀彼殊彩呈茲異軀披拂四氣翺
翔九衢恥祥鸞之止棘慕儀鳳之棲梧瑞表孝紀名標

祕圖將有感而必集豈獨殷周與有虞觀其隣

一作降

自

日域戾于天府音諧雅頌動中規矩頡頏其質差池其
羽步芳草而三趾徐來遡祥風而六翮微舞珍竒莫測
觀者如堵諒茲禽之禎祥告我皇之福祐於是羅者既
獲虞人是薦貯以瑤筐登于玉殿凝睿想迓神眇孤飛
砌上似於雲際而遊獨立君前疑乎日中而見聖情不
極念茲莫黑彼應感而至我有道而得狎以馴擾安其
棲息夜啼玉壘聲雖入于舜聰曙喚瑤階心豈知天帝

力不然者曷足以昭我皇之玄化表吾君之恭默是知
國將昌則降而為祥政或缺則歸彼扶桑天道不昧神
心孔彰豈有情在於斯烏固靈應昭乎彼蒼闕之旨
既集吾君之福祉與天地而終始儻不翦其毛羽願長
飛乎帝里

第二

王 顏

夫何赫赫之太陽忽降精於烏鳥乃呈瑞於皇王足應
乾之三數日曜日之九芒降天邑而于我李浴咸池而

自扶桑嘗空聞於前牒今實觀於殊祥天既無私祥何

能隱

一作信

昭聖代之有應垂休徵之無盡瑞于帝室表

大孝於天衷獻自尹京驗長安之日近始至也衆羽駭
集伊人驚萃邁麟鳳之時見何鷹隼之能畏如深就日
之誠不效搏風之志願委質而入貢終依仁以馴致入
銅籠而戢翼向金殿而矯翅將告于休似對以臆由是
憐楚人之迷鳳陋越裳之獻翟小哉棲棘之鸞茂矣應
風之鷦未如我陪日馭之出入遊天居之岑寂曩有赤

而呈美白以効靈俱非應乎殊貺亦或載於祥經

二字一作

嘉祥終未如符孝理之永錫昭寶運之康寧則如堯舜登

極夔龍夾輔布政無偏惟賢是取故得感陽精於上帝
贊陰陽於下土光昭萬葉輝映千古良史當載美而記
時謏才願賡歌而蹈舞

白雀賦

彼白雀兮降靈朱方羽皎皎而冰淨光紛紛而雪光既
無日浴不假雲翔馴階除兮玉彩相照向庭際而花影

飄揚皓然自居賁以為飾與物無競隨時游息知有文而賈害則純素保光知惡紫之奪朱則大白呈色叶我皇之金運旌我皇之道極又何貴乎黃以為名赤以為翼然後銜丹書以告社執玉環以述職所以異其類不能同塵所以隨其俗將以順人不假倉以耗國不穿屋以擇隣刺穆公之將死以人為殉雪治長之無罪示人有親無以為凡鳥也不據其實無以為珍禽也不利於物庶考言以察用時有得而無失若以酒成禮我則能

近取諸身若以農命官我則能將委其質百揆有序萬

物咸秩豈不知鴻鵠之志與尺鷃而為匹悲夫未處大

廈閑

疑作閑

于雕籠心眷戀兮猶期拂日羽推落兮半已

從風望銅臺而路遠想瑤池而宴終儻吾君兮為開一
面呈瑞兮還飛紫宮

越裳獻白雉賦

以周德方興遠夷入貢為韻

謝觀

憬彼越裳南之一方感皇化於蠻貊獻白雉於周王原
夫獲皎潔之姿奉鴻私之德閑靈質於雕玉馳星使於

絕域夕辭南土形迷夜月之光曉向北風影混朝霜之
色嗟乎跋涉空闊江山阻修途呈萬里星歲幾周過吳
門而練影光透惹曹風而麻衣色浮然後達成周之大
庭陳本國之所執歷雉門而捧進隨鴻臚而坐入俯雕
題而就位拱䟽趾以前集利觜玉植修頷一作頸縞戢風
搖細尾當軒而練帶長垂日照輕毛在手而雪花孤立
以其耿介無比貞明可稱距列瑤刺身擣鶴翎徘徊而
躡駒其轉奮迅而振鷺將興其淨珉潔其神露凝皎皎

敷粉亭亭卓冰自稟時清之化誠非日浴之能勿以臣
之賤所獻無微勿以禽之微所來自遠蒙恩覃而化及
似風行而草偃是以齋此嘉瑞唯憂後時欲以明誠上
答敢以遐阻為詞作獻靡遼東之豕不緇殊墨子之絲
一以見澤兼鳥獸一以彰德被蠻夷王乃愀然色動沈
然念茲發明南國之忠汝之遠矣舉奏殊方之瑞予甚
嘉之方知雉之潔兮可珍士之潔兮殊衆可珍猶尚
於夷俗殊衆可標於歲貢儻援引而不遺願舉白之

一送

上林白鹿賦

以君德至天珍
物充固為韻

李蒙

仰彼玄化稽乎典墳驗休徵於列辟知至理於有君遠
方圖物不寶旅葵之貢靈契潛感豈惟鳴鳳之聞降百
祥之昭晰和四氣之氛氲粵有奇獸言彰聖德賁然來
思載白其色才麋麋以呈貺不呦呦於野食謝僊家之
騰倚歸御苑而棲息於是上囿幽閒禁林清祕烟如玉
立皎若霜萃場町曠於池沙影光芒於山翠皇心愉兮

德所感衆目駭兮榮其至盡輻

疑作輻

為飾能隨太守之

車綠績稱珍可薦王侯之位且夫勁角昭勇縞色呈鮮

應皇家之盛德當聖運之承天足使殷帝之狼貳擅街

鈞之瑞吳門之馬慙當曳練之妍其來也則天祚明德

神推有仁故知以奇質表瑞非為育珍其擾也則一人有

道四海無拂故知以惠性舍和寧將翫物宜其禎祥遠

暢聖範光充保康功於勿伐彌大命於無窮重曰玄化

凝兮神

一作聖

功就瑞獸格兮充君囿質皜耀以霜潔角

淋漓

大人賦
作林離

而玉秀恥射兔於東遊笑獲麟于西狩惟

皇靈之介福固永命而何究

第二

同前
韻

蕭昕

大哉聖德望之如雲苑囿期廣動植惟分匪狙獷之獮
狨將煦育於氤氳伊生靈之遂性實咸若於吾君為白
鹿之呈瑞時或友而或羣夫其克牧禁苑喜樂王國庇
豐草而擇陰感食革而懷德奮角酪以共觝粲珪璋而
混色將攸處以寢興非鈇走而畏逼既而濯濯不羣呦

吻慕類狎威鳳以來格侶騶虞而必萃笑玄豹以深藏
晒飛黃而遠致貞姿麋麋若皓鶴之羣驚逸足駸駸齊
素翬而麋至然後飲刷銅沼咆哮瓊田忽往顧以騰倚
時決驟以周旋分形雪散曳影霜懸豈有虞之可即將
不羈於永年嘉禎祥之盼嚮知君德之屆天大矣哉固
當不愛其道不藏其珍我澤如浸我惠如春矧微貺之
不腆豈足彰乎至仁者哉伊茲獸之匪陋亦大塊之品
物感陶冶之相甄會禎祥之駿發將因質以受彩豈不

緇而自伐與芻狗之陶甄光圖牒之剪拂泱泱大風盛
德惟克嗟不識之狂簡願賡歌於帝功歌曰德由庚兮
羣物湊協嘉祥兮擾靈獸感訢合於天符遂充塞於君
園

白鹿夾輶賦

以行春布和瑞
獸來格為韻

許季同

政洽于下物惟表神彼奔走之絕類忽馴擾而歸仁爾
夾於輶豈陳力以効感我行其野將勸農以務春眷芳
林之躍躍偶大車之鞞鞞觀其頓足高步迴還左顧參

熊軾而左右分光望隼旟而疾徐有度惟德是擇惟賢
是輔觀皓影之來儀諒和風之克布曷晶真明霜濃雪
輕標玉質貫金精始呦呦而雙止終虞虞而偕行載馳
載驅軼輕塵於後乘乍騰乍倚驚逸騫於前旌映丹帷
之暉煥一作映陪露冕之光榮懷仁於衛君之轂亡疑作忘

味於食野之苹則福履攸綏神休是格翼戴高駕徜徉
廣陌不驚不懼彰爾性之閒和克皎克明契我躬之潔
白躑躅徘徊飲化而來政言可矣人詠康哉表靈慶而

有同神鳳狎馴養而不異龍媒懿彼僊都誕茲靈獸勁
角昭勇鮮光挺秀行而擇地恒町疇於道途出或以明
靡棲息於園囿老聃之御徒迷王母之乘何陋剪去煩
苛敷陳惠和皇疑作蝗出境而奚爾珠還浦而其何曷若
茲鹿擾于明義覈其理而莫窮求其類而罕譬無心
而應感不言而表瑞豈止其効於賤微樂驅馳於仁
智而已

白兔賦

以至仁垂化靈
物表祥為韻

蔣防

聖理遐遠圓穹

二字一作毛羣

効靈有兔爰止載白其形乘金

氣而來居然正色因月輪而下大叶祥經豈不以應至
道之神化彰吾君之德馨皎似霜輝温如玉粹毫素絲
而可擬足瓊枝而取類與三窟以殊歸將五靈而共至
潔朗貞質聯綿雅致名殊東郭韓盧不敢趨前迹近中
林蒼鷹無由得驚其容炳真其性懷仁飲玉池而冰光
不散食瑤草而雪影長新理符守黑事異文身儻使銜
鈎殷帝之狼不若如今受彩江生之筆非神載寢載興

或馴或擾仰天鑒以昭晰託御林而皎晶為太白之材
用作殊祥之標表原夫陰隲所為不識不知賁然練
被炯若星馳白則西方其理且同於服順兔為明視其
義取鑒於安危豈惟跼伏于林藪騰躍於堂垂者哉觀
其閑暇沐浴鴻化笈魯殿之浮名恥梁園之舊價俾夫
守株之士幾恨窮通過隙之駒空悲代謝是知隱霧而
憂者其文蔚反袂而嗟者其道屈曷若保貞白以暉映
承聖靈之剪拂同瑞牒而登高異周書而玩物所以克

福應富禎祥事資朴素匪亞文章知獸用之不擾審天
符之允臧伴祥烏於苑囿隣瑞鴈於池塘懿夫以道德
為蹄者其可忘

文苑英華卷八十九

欽定四庫全書

文苑英華卷九十

宋 李昉等 編

人事一

影賦一首

罔兩賦五首

響賦一首

聲賦一首

大音希聲賦一首

影賦

謝偃

何物類之實繁各異形而辨色惟茲影之靈化獨玄妍

而莫測若乃體無定質應變隨方因物成象不拘厥常
苟圭表之有度信天地之可量同寒暑之延促故夏短
而冬長在清明而必朗若晦濁而斯亡同至人之隱顯
類君子之行藏若夫長短倅形曲直應質細故則一毫
必具大物則萬象無失竝片魚而為比偶孤鳥而成匹
帶秋林而斲跡含春樹而還密將度雲而俱遠與奔駟
而同疾至如景霽氛收波清風止平湖數百澄江千里
有象必圖無物不擬羣木懸植叢山倒峙岸底天廻浪

中霞起成巨細其若一各委曲而相似窺之者莫測其

淺深尋之者罔知其終始苟煙霞之可乘何神丹之足

鍊流金液以命酌指玉京而高暝

一作宴

含虛無以成體

故日中而不見同希夷以寂寞何罔兩之能眩若夫來

往絕跡出入無間走不可避速不可捐非可以智察難

可以理詮向夜月而處後背朝日而居前何變化之無

定同瞻之而忽焉安仁覽以生悲士龍觀而興笑孫惠

顧以致悚田巴臨而獨照想古人之遺烈

一作形

哀吾生

之不劬守愚直以固窮無明畧以求効歲月忽其代序

斑鬢倏而改貌誠既往而莫追徒鑒流以自吊若夫色

動秋水光澄練

一作練

金翠羽朝映珠星夜臨近看若淺

遠矚如深信不入而疑入實非沈而似沈既寄形於流

艷又匿跡於凝陰類聖人之無已以萬物而為心福應

善而斯臻禍緣愆而必至念全德以守一思改過而無

二寧受屈以懷道不求伸以邀利庶履危以自最終餘

年而不墜苟刑網之所加雖在親而無肆誠言行之可

錄縱居嫌而勿棄必取捨而無私故捫心而不愧獨水
鏡之鑒物窮妍媸而莫祕誠斯道之可寶請貽戒乎在
位

罔兩賦

以道德希夷
仁美為韻

李 游

夫物有形而必累影隨形以相保窮希微而歸真信罔
兩之合道豈其取捨焉得醜好諒不由其運行實稟之
於玄造原夫不激不味無失無得寧在陽而必遷曷處
陰而自默罔言成象合莊叟之深衷

一作

責影辨疑異

田一作藥巴之見惑豈徒飾詞比事所以尊道貴德增於

物或有知其長短察於人孰可分其白黑搏之則微聽
之則希將去彼而取此由虛往而實歸明引喻混是非
用之於身豈疾走可息行之於國則至道之肥方來莫
逆故往無思吾有影而何患吾有色而可遺同焉皆得
沒而不衰尋邊鄙契之於罔象鑄扁鑄合之於希夷夫
焉一作然則豈止持莊子何其無特操與釋文特或作持
李善五臣注幽通賦並引莊子作持

操自保納虛為隣復歸無物更何有云匪勞逸之足眩

曷行藏之是親任皇人之化迹通天地之不仁况我國
家道周寥廓德及純粹偽歸真絕聖棄智漢陰抱甕
而匿影赤水遺珠而有愧罔兩難明恍惚無累徒以
知人藏化見德思義儻微陰之所及幸餘光兮不我
秘

第二
同前
韻

石鎮

粵若窮理盡性在宗載考觀窮玄元訂謨天造憫鷓鷯
之為得處一枝而屬厭詞罔兩而格言詳萬籟於至道

道之為體也無思無慮惟靜惟默黃帝得之而升于雲

天維斗得之而運于辰極下空同之路理必諧於襄野

登隱室之丘

已注二十九卷舉玉山賦

義無虧於建德爾其問影責

實稽謀惟微審行止之常分固怨苗而用希陰與夜兮

吾所隱火與日兮吾所依若有待而持操誠不恊於天

機且夫步日者足憐蛇者夔雖鳧莊子注鶴又作鶴並明各切而

異稟將斷續而則悲苟安時以處順惟我心之則夷如

莫邪之或躍必歐冶之見遺客有感之而歎曰大塊勞

我聖人不仁天地無私於覆載陰陽昭合於陶鈞動之則矯寘之則親汎然無跡瞠然絕塵時既來而不再物亦照而知春夫如是則何患無位不作守道安貧而已哉於是罔兩卑陬改容逡巡徐避養澹泊懷簡易鄙白龍之過制嗤文豹之有累寓百骸於神理休四海之光被在埏埴於洪鍾得修身之明義

第三 同前韻

蔣 至

揖傲吏以逍遙啓真經於探討則知辨彫萬物富有三

寶假影外之微陰喻域中之大道惟彼罔兩同夫糾纏
邈矣難名混兮不測離婁目眩而方見秦弘心計而寧
識其出也與影俱遊其入也與陰相息乃謂影曰子於
我兮何力我於子兮何德將詰之於心請對之於臆殊
途兮同歸孰是兮孰非進豈得苟退殊所希繫我有待
俾爾相依在波瀾而比目升雲漢而聯飛胡乃折責其
持操而欲論乎等威者哉且夫出入隨日行藏任時儀
刑長短取象毫釐雖曩華而今槁豈變態而殊姿語默

無滯類達人之舒卷視聽無及符至道之希夷原夫以
陰託影以影輔人行則無跡居必同塵不樂葆太寧悲
賤貧茹藜被褐非所恥腰金鳴玉非所珍誰泣楊朱之
路誰迷宣父之津誠滑疑於至理不天闕於天真未見
仁字
官則知於物有憑處身如寄和光遠害是其道先人後
己是其義鑒之者雖臨水而罕窺畏之者將奔走而奚
避欲明有象之無象有媿知音之意

第四

同前
韻

包信

罔兩謂形豈伊天造試一商榷此焉探討謂之小入乎
無間謂之大達於蒼昊雖則名參於異物抑亦理齊於
至道今將議其旨窮其色為一作無澀而不緇為繫而不

食或託之於鱗介或生之於羽翼謂子有回日之後謂
子有戴山之力向若執盈似虛大白若黑黽黽有難名
之稱乘乘有可尚之德苟不然者人將奚則彼逐者影
動每相依既不可逼又不可違凌青冥而對舉投汗漫
而雙飛鑒秋葉而逾靜臨夕陽而蹙微彼何事而相託

此何心而所希罔兩曰我形子影我應子追我憑子之
狀子假我之威寧論立兮與坐夫何操而不持似都捐
於視聽宛冥合於希夷未識形為影之主影亦形之賓
詎可貴之於動息又何怒之於因循使惡跡者止其足
厭影者蔭其身子之意兮焉適唯此求而得仁更憶班
固麗藻漆園清真述幽通於前烈繼逍遙於後塵沈吟
染翰顧慕書紳於是稽乎古陳乎義常未得其一端固
多慙於明試

第五

同前韻

孫 瑩

南華真人立玄古恣探討折罔兩之喻明希夷之道將
欲俾三光之懸為百代之寶其始也若乃天清氣明長
雲如掃呈纖微之虛質揚太陽之杲杲莫不以影為典
以形為則動靜委任濃纖合德欣禦冠之輕盈耻壽陵
之匍匐遇夫明也有似夫亨通遇夫陰也何異於否塞
罔兩責於影曰子實傷蹠吾之甚微謂為無也雖微而
必有謂為有也雖可名曰希吾將捨子而去子復何所

歸影乃假詞而論曰夫鴻鈞造物其道大夷至精者不
思而玄得情昏者後慮而不知則吾之與爾皆形之陰
也焉得以自顧亦何以舍天地之大德承日月之無私
幸文明之宣照故纖毫而不遺罔兩於是欣然而應曰
此乃適其身居其神靜躁匪肅吉凶由人雖讒構不能
以相間安繩墨之竟爾相因繫疑作夫行高道潔煦然
慈仁規行矩步和光同塵志存禮義上奉君親是以吾
以與爾俱得其真無終食之見捨罔疑作不孤之有隣

豈比夫共體器頑本枝險詖隨誇競以馳騁靡道德之
浸漬務咕囁之委曲疲趨趨之巧偽騰浮薄而為名竟
顛蹶以俱累豈與盛明之光燭希薦能而比義

響賦

以庭下雲晚
響輕為韻

張彥振

伊二儀之陶蒸

一作甄

覽萬物之生長為隨方而可見獨

不測乎茲響同大道之無質每憑虛而起象既不覩其
洪纖亦罕知其尺丈爾乃依聲以發有待而生觸萬竅
而皆異會五音而共成隨人心之哀樂因感名而重輕

至於驚激萬變高卑千轉臨北谷而悲多因歸風而去
遠感華鐘於霜曙思孤鴈於秋晚觸物類以成態託空
虛以運形爾其細也草蟲鳴於潛穴至其大也震雷作
於天庭離朱拭目而不見師曠清耳而可聽爾其響發
乎器必聲有假故器有盈虛而響為高下隨之則或一作
不可究及之如或可寫信造化之自然亦焉知其為者
乃有厭處雞羣窮栖海濱垂六翮而未舉鳴九臯而不
聞願託響於星驥希可徹於高雲

聲賦

張德昇

夫禮樂相成人之有生物歸乎理感在乎聲聲之所起
其應多矣既聞鄭以戒荒亦稱韶於盡美至若詩陳鐘
鼓禮奏笙簧疑作簧音懷律呂韻合宮商或婣娟而如絕

或窈窕而復揚將曲盡而逾妙遇風吹而更長潛鱗競
躍儀鳳來翔嘉此聲之可貴樂吾君之奉常則有思婦
傷離芳年屢換織素寒早調砧夜半埴鳴鶴而初合砌
吟蛩而正亂何此聲之可悲使空閨之浩歎况復金徽

遠奏

一作金徽遠戍

玉律窮秋陰風烈烈邊樹脩脩聽胡笳之

互動看隴水之分流何此聲之可怨使征客之含愁亦

有遁世無悶閒居栖託坐嘯竹林忘形菌

一作苔

閣隣宿

鳥之喧藪愛飛泉而噴壑何此聲之獨殊使幽人之為

樂夫意存則言發言發則聲來順之則喜逆之則哀是

以文君聽琴而悅矣子期聞笛而悲哉何悲歎之易感

使衆人之難裁客有吟者潛然下淚吾將不言安知所

謂退失路而流落進無媒而自致思巫峽之猿啼聞洞

金定四庫全書
卷九十
庭之葉墜易曰同聲相應同氣相求儻知音之見許期
厚德而相酬

大音希聲賦

以希則能大物
理之常為韻

揚發

聲本無形感物而會生彼寂寞歸乎靜泰含藏於金石
之中緘默於肺腸之外喻春雷之不震時至則興比洪
鐘之未撞扣之斯大靜勝允合於人心玄同遠符於天
籟大道冲漠至音希微叩於寂而音遠求於躁而道遠
三年之鳥不鳴驚人可異五絃之琴載絕知音蓋希人

生而靜物本無機脩於誠而上下交應臻其極而禽獸
咸歸遐想古風緬窮太始以彼聲音之道媿夫動靜之
理方歌擊壤堯人式貴於心和未夢鈞天趙簡尚勞於
傾耳鼓能興雨鍾亦候霜沖用可齊於道性善應方契
於天常興公之賦欲成已含金韻夫子之宮未壞猶闕
樂章無象無名不知不識守此虛淡終乎妙極豈逐物
而感通諒與少疑而消息損之而益潛運將契於天功
聽之不聞玄化極符於常則幽玄之旨足以明徵海內

於焉而自正天下無得以爭能由是廣可喻於人細可
齊於物聲希者其響必大聲煩者其理斯屈常呼萬歲
維嶽有時而降神將異三人點爾無心於鼓瑟理歸若
訥事契寡詞既不言以足教必於聲而可遺存而不論
馳神於六合之外語不如默鉗口於三緘之時是各從
其類也吾將一以貫之

文苑英華卷九十